



UNIVERSITI
TEKNOLOGI
MARA

Cawangan Terengganu

INFO US\$AHAWAN

usahawan pemacu ekonomi mapan

EDISI
24
MAY 2021 APRIL 2022

NO ISSN: ISSN: ISSN 1823-6421

BULETIN ADALAH HAK MILIK KEKAL MASMED UITM CAWANGAN TERENGGANU

LHDN dan Usahawan Baharu

Pandemik Covid-19 telah mengakibatkan ekonomi dunia menjadi lumpuh dan memberi impak kepada aktiviti perniagaan terutama kepada golongan usahawan baharu yang menjalankan perniagaan secara fizikal. Aspek terpenting yang diberikan penekanan oleh kerajaan dalam Belanjawan 2022 adalah memberi fokus kepada pembiayaan semula usahawan supaya dapat menjana semula pendapatan perniagaan mereka yang terjejas ekoran Perintah Kawalan Pergerakan (PKP) yang telah dilaksanakan lebih daripada tempoh satu tahun. Usahawan boleh ditakrifkan sebagai individu yang mempunyai sifat dorongan psikologi untuk mencapai kejayaan dalam setiap usaha yang dilakukannya dan akhirnya akan menghasilkan keuntungan. Di Malaysia, keuntungan yang dijana itu boleh dinikmati bersama semua golongan sekiranya usahawan baharu ini menjalankan tanggungjawab mereka dalam membayar cukai. Tidak dinafikan bahawa golongan usahawan adalah merupakan salah satu golongan pembayar cukai selain daripada syarikat dalam menyumbang kepada pendapatan negara. Menurut mantan Ketua Pegawai Eksekutif Lembaga Hasil Dalam Negeri, Datuk Seri Sabin Samitah, usahawan dapat memacu pertumbuhan ekonomi negara agar terus berkembang pesat yang dapat membantu meningkatkan hasil kutipan cukai selain peranan mereka sebagai agen yang menyediakan peluang pekerjaan.

Di Malaysia, seperti yang kita sedia maklum, sebahagian daripada pendapatan negara adalah dari sumber cukai sama ada cukai langsung atau cukai tidak langsung. Oleh itu, usahawan-usahawan yang menjalankan perniagaan ini tidak terkecuali daripada membayar cukai kepada kerajaan. Terdapat usahawan yang culas membayar cukai yang menyebabkan ketirisan kepada pendapatan negara kerana mereka berperanan sebagai golongan pembayar cukai utama yang membayar cukai di Malaysia. Semua pendapatan yang diperolehi di Malaysia adalah tertakluk kepada pengenaan cukai pendapatan seperti yang termaktub dalam "Seksyen 3, Akta Cukai Pendapatan 1967. Bagi sesuatu perniagaan, cukai pendapatan akan dikenakan selepas mengambil kira semua perbelanjaan operasi perniagaan serta tuntutan dan belanja yang boleh dituntut. Pengetahuan mengenai percukaian sangat membantu usahawan baharu agar penjimatan cukai pendapatan sebagai peniaga dapat dimaksimakan.

Kerajaan memainkan peranan besar dalam pembangunan seseorang usahawan baharu melalui pemberian geran dan insentif. Geran dan insentif ini seumpama bayaran balik kepada usahawan baharu yang diperolehi melalui pembayaran cukai mereka. Melalui geran dan insentif ini, mereka dapat menjana pendapatan dan membantu perniagaan mereka pada masa hadapan. Antara contoh geran kerajaan yang diberi kepada usahawan adalah seperti SME Digitisation Grant, MARA Business Payment Rescheduling, Permai Special Prihatin Grant dan banyak lagi. Usahawan baharu ini tidak seharusnya mengelakkan diri dari tanggungjawab mereka dalam pembayaran cukai sebaliknya mereka perlu peka kepada pelbagai geran dan insentif yang diberikan oleh kerajaan kepada mereka terutamanya kepada usahawan baharu dalam memulakan perniagaan.

Terdapat 2 jenis kutipan cukai utama yang menyumbang kepada pendapatan negara iaitu cukai langsung dan cukai tidak langsung. Cukai langsung seperti cukai pendapatan individu, cukai pendapatan syarikat, cukai keuntungan harta tanah dan sebagainya. Cukai ini telah menyumbang lebih 50 peratus kepada hasil manakala cukai tidak langsung seperti cukai perkhidmatan, cukai jualan dan sebagainya menyumbang sekitar 25 peratus hingga 30 peratus. Melalui Lembaga Hasil Dalam Negeri (LHDN), kerajaan berusaha untuk meningkatkan hasil kutipan tersebut yang berperanan memacu pertumbuhan ekonomi negara. Namun, berikutan penularan pandemik Covid-19 yang serius ini telah menjejaskan kutipan hasil negara. LHDN perlu meneliti dan menyusun kembali strategi dan sistem cukai pendapatan yang lebih cekap lagi supaya rakyat dan negara dapat bangkit kembali dari segi ekonomi dan sosial.

Persoalannya kini adalah terdapat segelintir usahawan baharu yang tidak patuh atau culas untuk membayar cukai kepada kerajaan. Bagaimanakah usaha untuk mendidik usahawan baharu yang menjalankan perniagaan untuk membayar cukai secara sukarela kepada kerajaan demi melaksanakan tanggungjawab mereka sebagai rakyat Malaysia? Pematuhan cukai secara sukarela telah diperkenalkan oleh LHDN pada tahun 2004 dibawah Sistem Taksir Sendiri (STS) untuk meningkatkan pematuhan cukai. Di bawah STS, individu atau syarikat yang mempunyai pendapatan yang layak untuk dikenakan cukai di bawah undang-undang cukai Malaysia perlu melaporkan maklumat pendapatan dengan jujur, mengira kewajipan cukai dengan tepat dan memberikan borang nyata cukai berserta pembayaran cukai tepat pada masanya atau sebelum tarikh akhir yang ditetapkan. Usahawan baharu yang menjalankan perniagaan perlu didedahkan mengenai tanggungjawab mereka untuk mengisytiharkan keuntungan yang diperolehi secara sukarela kepada LHDN. LHDN juga perlu memastikan semua usahawan baharu mempunyai pengetahuan yang secukupnya mengenai undang-undang percukaian di Malaysia. Ini merupakan cabaran utama yang dihadapi oleh LHDN dalam mendidik dan menyalurkan maklumat percukaian kepada usahawan baharu. Pihak LHDN juga perlu menganjurkan bengkel-bengkel berkenaan percukaian dan pematuhan cukai agar mereka tidak culas dan mematuhi akta percukaian.

Antara ilmu berkenaan percukaian yang perlu diberi penekanan oleh LHDN kepada usahawan baharu ini adalah pengetahuan berkenaan pengiraan cukai yang perlu dibayar, maklumat berkenaan pengecualian

cukai, belanja yang boleh dituntut dan lain-lain lagi agar maklumat itu tepat dan memanfaatkan pembayar cukai. Ini adalah untuk mengelakkan pembayar cukai daripada membayar penalti sekiranya maklumat yang dilaporkan tidak tepat dan terpesong. Pihak LHDN juga perlu memastikan mereka menunaikan pembayaran cukai dengan rasa tanggungjawab, maklumat yang dilaporkan adalah tepat dan mengikut masa yang telah ditetapkan. Sebagai contohnya, usahawan baharu yang memperoleh pendapatan melalui sumber perniagaan mesti didedahkan dengan pengetahuan pembayaran dan penghantaran borang-borang yang berkaitan dengan percukaian, tarikh penghantaran borang atau maklumat cukai contohnya jika sekiranya pembayar cukai mempunyai perniagaan, mereka mesti melaporkan pendapatan dan menghantar borang pada atau sebelum tarikh akhir iaitu pada 30 Jun setiap tahun. Sekiranya usahawan baharu tidak mempunyai pengetahuan ini, mereka akan menghantar borang dan membayar cukai melebihi tempoh masa yang telah ditetapkan dan kebarangkalian mereka dikenakan hukuman atau penalti oleh LHDN adalah tinggi.

Pelbagai usaha dilakukan oleh LHDN untuk mendidik pembayar cukai bagi mematuhi cukai seperti memperkenalkan 'Taxpayers Service Month' iaitu menyediakan lebih banyak kaunter perkhidmatan termasuk hujung minggu untuk memudahkan usahawan berurusan dengan pegawai berkaitan dengan urusan percukaian mereka. LHDN giat melakukan kempen pembayaran cukai secara sukarela di pelbagai platform seperti di televisyen, radio, suratkhbar dan website. LHDN telah mengadakan pelbagai bengkel percuma untuk membantu usahawan baharu yang tidak mempunyai ejen cukai untuk membantu mereka menguruskan urusan percukaian. Selain itu, LHDN juga mengadakan seminar percukaian dan menyalurkan maklumat terkini tentang urusan percukaian.

Kesimpulannya, LHDN tidak akan sesekali berkompromi atau bertolak ansur dengan tindakan yang dilakukan oleh usahawan sekiranya mereka mempunyai niat untuk mengelak diri daripada membayar cukai. Ini secara tidak langsung boleh mengakibatkan ketirisan kepada hasil pendapatan negara. LHDN menyeru semua pihak untuk menyalurkan maklumat kepada mereka sekiranya terdapat usahawan baharu yang menjalankan perniagaan tetapi mengelak daripada membayar cukai di Malaysia. Bersama-sama kita menjalankan tanggungjawab sebagai rakyat Malaysia disamping menyumbang kepada pembangunan negara.

Rujukan

- [1] Hassan, N., Nawawi, A., & Puteh Salin, A. S. A. (2016). *Improving tax compliance via tax education-Malaysian experience*. *Management & Accounting Review (MAR)*, 15(2), 1-20.
- [2] http://www.customs.gov.my/en/faq/Pages/faq_stx.aspx
- [3] <https://www.mof.gov.my/portal/ms/berita/akhbar/kerajaan-terus-bantu-rakyat-dan-perniagaan-cukai-keuntungan-luar-biasa-tidak-diperluaskan>
- [4] <https://www.bharian.com.my/berita/nasional/2021/10/878192/manfaatkan-skimbantuan-kerajaan-mula-perniagaan>
- [5] <https://www.hmetro.com.my/mutakhir/2019/12/523990/boleh-dikena-cukai>
- [6] <https://www.bharian.com.my/berita/nasional/2019/09/610560/lhdn-didik-siswazah-celik-cukai>